

Na osnovu člana 3. stav (2) tačka a) i člana 10. stav (4) Zakona o genetički modificiranim organizmima ("Službeni glasnik BiH", br. 23/09), Federalno ministarstvo obrazovanja i nauke donosi

PRAVILNIK

o izmjenama i dopunama Pravilnika o sadržaju, obimu i metodologiji procjene rizika za ograničenu uporabu genetski modificiranih organizama u kontroliranim zatvorenim sistemima

Član 1.

U Pravilniku o sadržaju, obimu i metodologiji procjene rizika za ograničenu uporabu genetski modificiranih organizama u kontroliranim zatvorenim sistemima („Službene novine Federacije Bosne i Hercegovine“, broj 72/22), u članu 2. vrši se dopuna i dodaju se stavovi (2),(3),(4) i (5):

„(2) Procjenu rizika za ograničenu uporabu genetski modificiranih organizama u kontroliranim zatvorenim sistemima prema ovom pravilniku, vrši pravni subjekt koji ima ovlaštenje Vijeća ministara Bosne i Hercegovine.

(3)Pravni subjekt zainteresiran za izradu procjene rizika za ograničenu uporabu genetski modificiranih organizama u kontroliranim zatvorenim sistemima, dužan je Federalnom ministarstvu obrazovanja i nauke (u daljem tekstu: Ministarstvo) podnijeti zahtjev za izdavanje ovlaštenja za provođenje procjene rizika, u skladu sa ovim pravilnikom.

(4) Zahtjev za izdavanje ovlaštenja iz stava (3) ovog člana sadrži:

a) osnovne podatke o podnosiocu zahtjeva, uključujući naziv i sjedište podnosioca zahtjeva, identifikacijski/matični broj, izvod iz registra za podnosioca zahtjeva, fotokopiju akta o osnivanju koji dostavlja podnositelj zahtjeva, ime i prezime odgovorne osobe, broj telefona i adresu elektroničke pošte.

b) popis zaposlenih stručnih djelatnika i vanjskih stručnih suradnika za rad na stručnim poslovima u području procjene rizika uvođenja GMO-a s dokazom o njihovoj kvalifikaciji, opisom radnog iskustva, kontakt telefonom i adresom

c) ostale dokaze o radnom iskustvu, istraživanjima, i njihovim rezultatima, domaćoj i/ili međunarodnoj suradnji na području problematike uvođenja GMO-a i općenito GMO-a, te podatke o specijalističkim stručnim usavršavanjima.

(5)Ministarstvo za može tražiti od podnosioca zahtjeva i druge dokaze u cilju utvrđivanja kredibilitnosti.

Član 2.

Iza člana 2. dodaje se član 2a., koji glasi:

„(1) Pravni subjekt zainteresiran za izradu procjene rizika za ograničenu uporabu genetski modificiranih organizama u kontroliranim zatvorenim sistemima mora ispunjavati sljedeće uvjete:

- a) imati registriranu i upisanu djelatnost instituta, zavoda ili fakulteta koja djelatnost garantira da je izrada procjene rizika, utemeljena na znanstveno-stručnim analizama i analizama za tehničko ispitivanje i analiziranje koji se koriste u izradi procjene rizika za ograničenu uporabu genetski modificiranih organizama u kontroliranim zatvorenim sistemima
- b) imati najmanje tri osobe sa završenim sveučilišnim diplomskim studijem (prvi i drugi ciklus) ili integriranim studijem iz područja prirodnih ili biotehničkih ili biomedicinskih ili medicinskih znanosti ili veterinarskih, zaposlene u stalnom radnom odnosu sa minimalno tri godine radnog iskustva, od kojih najmanje jedna osoba ima kvalifikacije stečene završetkom trećeg ciklusa (doktorski studij) iz navedenih područja.
- c) imati odgovarajući radni prostor, bilo u vlasništvu ili u zakupu u trajanju propisanom za važenje ovlaštenja za obavljanje djelatnosti procjene rizika, u kojemu će obavljati sve potrebne radnje u postupku izrade procjene rizika, osim one koje se po prirodi stvari obavljaju drugdje.

(2) Pravni subjekt iz stava (1) ovog člana može po potrebi ugovorom angažirati vanjske stručnjake posebno specijalizirane za pojedina područja neophodna za izradu procjene rizika uz obveznu prethodnu prijavu vanjskog stručnjaka Ministarstvu.

(3) Procjenu rizika za ograničenu uporabu genetski modificiranih organizama u kontroliranim zatvorenim sistemima obavezno svojim potpisom potvrđuje odgovorna osoba unutar pravnog subjekta.

(4) U slučaju bilo kakvih promjena kod pravnog subjekta, vezano za ispunjenje uvjeta iz ovog člana, pravni subjekt obavezan je obavijestiti Ministarstvo.

Član 3.

Iza člana 2a. dodaje se član 2b., koji glasi:

„(1) U cilju rješavanja podnesenog zahtjeva za izdavanje ovlaštenja za provođenje procjene rizika, u skladu sa ovim pravilnikom, Ministarstvo formira komisiju od tri člana (u daljem tekstu: Komisija), koja provodi ispitni postupak, i u roku od 30 dana dužna je ispitati zahtjev pravnog subjekta, izvršiti pregled prostora i opreme, te utvrditi da li pravni subjekt ispunjava uvjete za izradu procjene rizika za ograničenu uporabu genetski modificiranih organizama u kontroliranim zatvorenim sistemima.

(2) U sastavu Komisije, bit će imenovani, pored voditelja postupka iz Ministarstva, vanjski saradnici, stručnjaci za predmetnu oblast.

(3) Komisija je nakon provedenog postupka iz stava (1) ovog člana obavezna ministru dostaviti mišljenje sa prijedlogom o upućivanju pravnog subjekta u dalju proceduru, prema Agenciji za sigurnost hrane, odnosno Vijeću za genetski modificirane organizme koje djeluje u okviru Agencije, te Vijeću ministara Bosne i Hercegovine.

(4) Vijeće ministara Bosne i Hercegovine daje ovlaštenje za izradu procjene rizika za ograničenu uporabu genetski modificiranih organizama u kontroliranim zatvorenim sistemima, na period od 5 godina, uz mogućnost produženja ovlaštenja.

(5) Ministarstvo najmanje jednom godišnje provodi nadzor kod pravnog subjekta ovlaštenog za izradu procjene rizika za ograničenu uporabu genetski modificiranih organizama u kontroliranim zatvorenim sistemima, u pogledu ispunjavanja uvjeta prema ovom pravilniku.

(6) Pravni subjekt koji ima ovlaštenje od Vijeća ministara, Procjenu rizika izrađuje na obrascu za Procjenu rizika koji je Prilog 2 i sastavni dio ovog Pravilnika“

Član 4.

Ovaj pravilnik stupa na snagu osmog dana od dana objave u "Službenim novinama Federacije BiH".

MINISTRICA